

Intervención de José Luis Martínez Sanjurjo na súa toma de posesión como alcalde do Concello de Ordes.

Casa Consistorial de Ordes, 15-06-2019

Alcalde de Ordes (1983-87), Don Manuel-Antonio Viqueira Vereá.

Alcalde de Ordes (1987-2007), Don Teodosio Martino Martino.

Concelleiras e concelleiros aquí presentes, que nos acompañades hoxe, e formastes parte da corporación municipal en mandatos anteriores.

Concelleiras e concelleiros de Ordes que hoxe tomastes posesión do cargo, funcionarios e persoal municipal, medios de comunicación aquí presentes, e ointes de Radio Ordes que nos escoitan polas ondas,...

Veciñas e veciños:

Bos días a todas e a todos, moitas grazas por participar en esta sesión.

Grazas, en primeiro lugar, pola vosa asistencia a este acto de toma de posesión da Corporación Municipal de Ordes e da elección do Alcalde para a Lexislatura 2019-2023, un mandato ao que nos enfrontaremos a retos e a oportunidades de envergadura, aos que trataremos de responder con traballo, con ilusión, con rigor, con honestidade e con absoluta transparencia.

Falo en todos os casos, de valores que moitos aprendemos desde pequenos, nas nosas casas, das nosas familias; valores compartidos pola inmensa maioría da veciñanza de Ordes á que, desde xa me comprometo, a servir coa dedicación e coa intensidade que o noso Concello merece e necesita.

O Concello non é do alcalde nin dos concelleiros; é una institución da xente, que xestiona recursos públicos, que son de todas e todos; nós, somos administradores temporais obrigados a render contas da nosa xestión.

Comeza un mandato ilusionante no que, en primeiro lugar, cómpre dicir grazas.

- Agradecemento ao inmenso caudal de confianza que articulou una maioría absoluta que fará máis doada a acción de Goberno, non tanto en beneficio propio, senón a prol de todas as veciñas e veciños. **O DITO E FEITO**, da pasada campaña electoral, que tan ben entendeu a nosa veciñanza, ten que seguir a ser o fin principal dos nosos actos e feitos, do noso modo de actuar, falar facendo, un lema “Dito e Feito” que nos guiou e que por sempre nos guiará, pois sei certamente que a ningún de nos xamais se nos vai a olvidar.
- E agradecemento, por suposto, a cantos lexitimamente optaron por opción políticas diferentes, porque esa é precisamente a esencia de democracias avanzadas como a española.

Nese espírito reitero que serei o alcalde de todas e todos os ordenses, dos que me votaron e dos que non, porque por riba das opcións ideolóxicas ou das afinidades persoais se sitúa a procura do ben común que marcará cada día do meu traballo e do de cantos me acompañarán nesta tarefa.

Aos grupos da oposición ofrezco lealdade institucional e man tendida, porque por riba das nosas diferenzas se sitúa o interese supremo de Ordes. Agardo e desexo que así sexa, comprometo dende xá o meu empeño en esa tarefa de articular e coordinar unha interlocución fluida e exemplar en beneficio de todos.

Así como no pasado fomos quen de chegar a acordos que redundaron en beneficio da veciñanza, agardo e desexo que no futuro inmediato sexamos quen de reeditar pactos beneficiosos para Ordes.

Un aforismo atribuído a *Winston Churchill* sinala que **o político se convirte en estadista cando comeza a pensar nas próximas xeracións e non nas próximas eleccións**. Fariamos ben, goberno por suposto, pero tamén a oposición, en aplicarnos este principio, superar tentacións curttopracistas e remar sempre na procura de novas metas de progreso e estabilidade para Ordes.

Son moitos, como dicía, os retos que aos debemos facer fronte decontado. Temos pendente a aprobación provisional e definitiva do PXOM, un documento fundamental para asegurar o presente e o futuro de Ordes; un desafío no que convido a participar á totalidade da Corporación na procura do mellor para Ordes e a súa xente.

Na Lexislatura que remata, e malia as dificultades por todos coñecidas como o fráxil equilibrio de forzas cun grupo municipal do PPdeG en minoría, fomos quen de dar resposta satisfactoria a carencias e problemas enquistados que algún mesmo consideraban irresolubles.

Incluso fomos quen de revertir satisfactoriamente unha situación económica e financeira lastrada das débedas contraídas no pasado, e que actualmente nos permite que nos atopemos preparados para afrontar novos retos e proxectos; e a todos eles, a pesares de gozar dende hoxe de unha maioría absoluta outorgada pola veciñanza, vos quero ofrecer a oportunidade de que todas e todos os concelleiros sexades partícipes nos vindeiros 4 anos.

Ningunha ou case ningunha meta resulta inalcanzable con traballo, con constancia e con ilusión, máxime cando dispoñemos de recursos e fortalezas que para si quixeran outros territorios, nomeadamente os do interior.

Un dos pais da Galicia contemporánea, *Alfonso Daniel Rodríguez Castelao* recordaba que, durante unha visita ás minas de West Virginia, nos Estados Unidos, un dos moitos galegos que traballaban alí advertiulle que non consentiría que propagase o galeguismo naquelas terras, “porque para el non había máis patria que o mundo”.

“Pero fixémolos chorar –relata Castelao- ao lembrarlle a fermosura das nosas paisaxes, a beleza dos nosos monumentos, a ledicia das nosas festas, a dozura das nosas cantigas, a sabedoría dos nosos refráns, a quentura dos nosos fogares, a bondade das nosas mulleres, a xustiza das nosas reivindicacións, a humanidade do noso espírito... E aquel terrible internacionalista acabou por confesar nos que Galicia era o mellor país do mundo”.

En efecto, veciñas e veciños, vivimos no mellor país do mundo malia que ás veces non nos decatemos diso.

Máis aló das hipérboles, estou seguro de que todos arelamos un Ordes mellor, e que facer de Ordes o mellor lugar do mundo é un desexo compartido por todos nos, no que insisto unha vez mais, a todos convido a participar; co seu apoio, e tamén coas súas críticas, porque tamén as críticas son necesarias e de elas se aprende, na medida en que axudan a mellorar e a corrixir o rumbo cando resulte necesario.

Que así sexa.

Terra a nosa!